

НЭГДҮГЭЭР ХЭСЭГ
ЦЭРГИЙН АЛБА ХААГЧИЙН
ХООРОНДЫН ХАРИЛЦАА

НЭГДҮГЭЭР БҮЛЭГ

ЦЭРГИЙН АЛБА ХААГЧИЙН ЭРХ, ҮҮРЭГ, ХАРИУЦЛАГА

Нийтлэг үндэслэл

6. Монгол Улсын иргэн нь Үндсэн хуульд заасны дагуу Эх орноо хамгаалах, хуулийн дагуу цэргийн алба хаах үүрэгтэй.

7. Монгол Улсын хуулийн дагуу цэргийн жинхэнэ албыг биеэр хааж байгаа иргэн, цэргийн сургууль, цугларалтад оролцож буй бэлтгэл үүрэгтнийг цэргийн алба хаагч гэнэ.

8. Цэргийн алба хаагч нь Монгол Улсын Үндсэн хууль, бусад хуульд заасан иргэний нийтлэг эрх, эрх чөлөөг эдэлж, үүрэг биелүүлэхийн зэрэгцээ цэргийн албаны онцлогтой холбогдсон давуу эрх, хөнгөлөлт, хязгаарлалттай байна.

ЦЭРГИЙН АЛБА ХААГЧИЙН НИЙТЛЭГ ЭРХ

9. Цэргийн алба хаагчийн эрх нь Монгол Улсын Үндсэн хууль, бусад хууль тогтоомжийн акт, энэ дүрмээр тодорхойлогдоно.

10. Цэргийн алба хаагчийн эрхийг **“Цэргийн алба хаагчийн эрх зүйн байдлын тухай”** болон бусад хуулиар хязгаарлана.

11. Цэргийн алба хаагч нь **“Цэргийн алба хаагчийн эрх зүйн байдлын тухай”** хуулийн 10 дугаар зүйлд зааснаар галт зэвсэг хэрэглэх эрхтэй.

12. Цэргийн алба хаагчийн зэвсэг хэрэглэх журмыг **“Цэргийн хүрээний ба харуулын албаны дүрэм”**-ээр тогтооно.

ЦЭРГИЙН АЛБА ХААГЧИЙН НИЙТЛЭГ ҮҮРЭГ

13. Цэргийн алба хаагч нь дараах үүрэгтэй:

13.1. Эх орон, төр, ард түмнээ хүндэтгэн дээдэлж, өргөсөн тангарагтаа үнэнч байх;

13.2. Монгол Улсын хууль, цэргийн дүрмийг чанд сахин биелүүлж, захирах, захирагдах ёс, цэргийн албаны ёс зүйн хэм хэмжээг мөрдөх;

13.3. гадаадад үүрэг гүйцэтгэх, суралцах үедээ НҮБ-ын дүрэм, холбогдох хамтын ажиллагааны баримт бичиг, тухайн улс орны хуулийг мөрдөх, Зэвсэгт хүчний нэр хүндийг өндөрт өргөж явах;

13.4. үүргээ эрэлхэг зоригтой, санаачилагатай, сахилгатай, үнэнч шударга биелүүлж, тохиолдсон бэрхшээлийг тэсвэртэй даван туулах;

13.5. хариуцсан байлдааны зэвсэг, техникийг төгс эзэмшиж, үүрэг гүйцэтгэхэд бэлэн байлгаж, төрийн болон цэргийн өмч хөрөнгийг хамгаалах;

13.6. төрийн болон албаны нууцыг чанд хадгалах, хамгаалах, мэдээллийн аюулгүй байдлыг хангах;

13.7. нөхрөө болон иргэдийг гамшиг, аюулт үзэгдэл, ослын аюулаас аврах, нэрвэгдэгсдэд туслах, тэдэнд эмнэлгийн анхны тусламж үзүүлэх;

13.8. эелдэг зан харилцааг эрхэмлэж, ёсолж хүндэтгэх журам, нийтээр

хүлээн зөвшөөрөгдсөн ёс суртахууны хэм хэмжээг ёсчилон сахих.

ЦЭРГИЙН АЛБА ХААГЧИЙН ХҮЛЭЭХ ХАРИУЦЛАГА

14. Цэргийн алба хаагч нь албан тушаал, цэргийн цол харгалзахгүйгээр Монгол Улсын хууль тогтоомжид заасны дагуу хариуцлага хүлээнэ:

14.1. цэргийн албаны ёс зүй, цэргийн сахилга, цэргийн дүрэм зөрчвөл **сахилгын**;

14.2. хууль, эрх зүйн актаар тогтоосон хэм хэмжээг зөрчвөл **захиргааны**;

14.3. иргэний үүргээ биелүүлээгүйгээс төр, нийгэм болон иргэдэд хохирол учруулбал **иргэний**;

14.4. цэргийн эд хөрөнгөд хохирол учруулбал **эд хөрөнгийн**;

14.5. гэмт хэрэг үйлдсэн нь нотлогдсон бол **эрүүгийн** хариуцлага хүлээнэ.

15. Төрийн болон албаны нууцыг задруулбал “Төрийн болон албаны нууцын тухай” хуулийн дагуу эрүүгийн, сахилгын хариуцлага хүлээнэ.